

Mazarin

2486

Suzanne de Nerveze
La monarchie affligée ...

RARE BOOK
COLLECTION



THE LIBRARY OF THE
UNIVERSITY OF
NORTH CAROLINA
AT
CHAPEL HILL

Mazarin
2486

UNIVERSITY OF N.C. AT CHAPEL HILL



00023006774

LA MONARCHIE AFFLIGÉE,

Avec ses Consolations Politiques
& Chrétiennes.

A Monseigneur le Prince de Conty.



A PARIS,

Par ROBERT SARA, rue de la Harpe,
au Bras d'Hercule.

M. DC. XLIX.

LA MONARCHIE

AFFICHES

Ames de la Cour de la République

de la République

et de la République de la République



A PARIS

Par ROBERT SARRA, rue de la Harpe,
au Salon d'Horloge.

M. DC. XLIX



LA MONARCHIE AFFLIGEE,
avec ses Consolations Politiques & Chrestiennes.

A Monseigneur le Prince de Conty.



MONSIEUR,

Voicy des cœurs oppressez qui attendent de Vostre Altesse l'appuy & la consolation qu'ils ne peuuent pleinement receuoir que de vostre vertu; ce sang des Roys qui boüillonne dans vos veines assure nos craintes, & nous fait esperer le calme dans le pitoyable desordre du temps; ce beau visage qui nous sert de caution pour les belles resolutions de vostre ame, a aussi attiré nos zelez mouuemens; si bien que cette florissante, & affligée Cité attend ses plus hautes consolations de vostre sage & iudicieuse conduite, MONSIEUR; la paix & l'union se verra bien tost conclüe avec le retour d'un Monarque Triomphant au grand contentement de tous les bons François; nos armes apres cela feront des conquestes sur les Infideles, le frere & l'amy vengeront esgalement les outrages de leurs agresseurs, & cette belliqueuse Nation que nul ne peut surmonter, n'agira plus à la destruction de ses mesmes forces. Autrefois les femmes Sabines empescherent les efforts des Romains: Mais nous auons plus d'aduantage à present; ce ne sera point l'infirmité d'un sexe larmoyant: Vn Heros prendra un glorieux & diuin ascendant sur les volontez alterées pour en faire reüssir des saints accommodemens, qui consolans nos legitimes, & trop longues allarmes, iamaïs la France n'a

esté plus glorieuse. Toutes les nations la craignent & la reuerrent, elle possède vn Roy de miracle, qui promet tout ce qu'on peut souhaiter de grand & d'excellét. Vn Duc d'Anjou qui partage avec sa Maieité les qualitez admirables d'un Prince tres-accomply, vne Reine pieuse, sage, liberale, & charitable, & qui n'estime son regne que pour en acquerir vn autre dans le Ciel plus ferme, & moins sujet aux accidens de la fortune; son humilité n'a iamais retiré son oreille non plus que sa compassion des gemissemens des miserables; si bien que dans ce commun malheur, le merite de cette grande & deuote Princesse sera d'un prix inestimable deuant celuy qui penetre les interieurs innocens. Cet Estre infiny l'a couronnée, sans doute, d'une double couronne, l'une est d'or, & l'autre d'espines: car c'est dans les traueses, comme l'or dans la fournaise, que le pur est separé de l'impur, & i'estime que prendre des sentimens contraires, c'est imiter les voisins lascifs de Lot, qui vouloient corrompre la pureté des Anges. Il ne faut pas iuger les pensées par les euenemens, puis que le Maistre des destinées en ordonne au gré de sa Prouidence, & il ne tombepas vn de nos cheueux que sa sagesse ne leur ait prescrit leur cheute, nos attentes ont d'ordinaire des succez differens, parce que l'aduenir est dans la dépendance eternelle, c'est ce que nous deuons croire avec fermeté, & que sa Bonté donnera vn bon conseil à nos Superieurs, avec l'amitié & la paix dans leur souhaitée intelligence. Son Altesse Royale qui est vn des puissans appuis de cet Estat, avec Monsieur le Prince, ce Dompteur des Espagnes, ce Foudre de Guerre, & ce Mars de nos Armées, ne pourront iamais mesurer leurs espées à la vostre. Non, MONSIEIGNEVR, c'est ce que Dieu ne permettra pas, s'il luy plaist, il n'est pas iuste de faire
ces

ces funestes métamorphoses de changer nos boucliers contre des armes fratricides, homicides, & parricides. Il ne faut pas pleurer avec Dauid la prise d'Absalon; tant de braues Capitaines qui ont remporté des victoires sans nombre sur les ennemis de l'Estat, se verroient-ils forcez de s'esprouuer contre les genereux & puissans compagnons de leurs victoires? MONSIEUR, c'est à quoy vostre Altesse doit opposer les dignes effects d'un genie incomparable, que le sang Royal des Heroïques & genereux Bourbons, reste pour la seureté d'un trosne magnifique, & que la sagesse que l'Eternel a communiqué à cette sacrée Race, ne soit pas au prejudice de nos vœux & de nos esperances, inutile au repos public. MONSIEUR, nos Autels fument des Encens donnez au Seigneur, il nous fait voir sa Bonté dans son exposition sacramentaire, pour oster de nos fureurs les excez qui l'offensent. Son amour veut esmouvoir le nostre, & c'est à nos repentances de luy demander misericorde. Nous sommes des Niniuites criminels, nos larmes ne peuuent effacer nos crimes: mais nous esperons que vostre pieté sera le milieu entre nos miseres & leur allegement. Nous ne scaurions obtenir de victoire qui ne soit fascheuse, aussi la demandons nous moins qu'une Chrestienne paix; tout le monde crie, Viue le Roy, & nos Princes, sans pouuoir faire de distinction dans vn si triste partage. MONSIEUR, les peuples sont ravis d'obeir à vos ordres: mais i'ose vous dire qu'ils ne le feront pas peu d'accompagner la Cour à l'Autel de la Vierge, pour y chanter vn *Te Deum*, en action de graces de nostre deliurance: ie dis deliurance, puis que nous sommes dans vne funeste calamité, transis de tristesse & d'horreur par la consideration de l'estat present. Plaise à la diuine Bonté d'inspirer vn mou-

uement salutaire à nos Maistres. Vostre Altesse a droit de
 souueraineté par tout où vostre nom & vos habitudes trou-
 uent desames équitables. Pallas vous a donné ses sciences, sa
 douceur, sa modestie & sa prudence: mais il faut que vostre
 Altesse luy arrache son Oliue pour en faire le cher obiet de
 nos plus durables contentemens. MONSEIGNEUR, lors
 que Dieu monta au Ciel, il laissa la paix à ses Disciples; à son
 exemple procurez-là, si vous plaist, avec ce grand Duc de
 Longueuille, & le reste de vostre Martiale Societé, à des peu-
 ples affligez. Que ce triste Bourgeois qui paroist sous vos ba-
 nieres reprenne son employ, qu'il contribue ses fidelitez &
 son industrie à l'embellissement & à la grandeur de ce Royal
 séjour, & que tout content de se descharger du pesant fardeau
 de ses armes, il en ignore pour iamais l'usage, se resioüissant
 dans sa Chrestienne famille de n'auoir plus de monstres à
 combattre. Viue le Roy, la Reine, & nos Princes; viue la Iusti-
 ce & l'Ordre du Royaume; que la souueraine Cour de Parle-
 ment estant l'organe de nos Rois, & l'interprete de leurs de-
 crets soit de mesme la dispensatrice de nos ioyes & de leur du-
 rée, & qu'estant les Soleils de nostre Monarchie, ils dissipent
 sans passion tous les nuages qui nous enuironnent. MONSEI-
 GNEUR, cet auguste corps se trouue agreablement animé
 par ce puissant esprit qu'ils admirent dans vos raisonnemens;
 si bien que mon zele tres. humble ne cesse de vous considerer
 comme l'Agent impeccable & vniuersel d'une Paix generale.
 Fasse le Ciel que nous en puissions faire retentir les acclama-
 tions iusques aux voutes azurées, & par tous les lieux qui at-
 tendent leur prosperité de nos dissensions, & que nos cœurs
 attachés à une recognoissance deuote & fidele, nous puissions
 le reste de nostre vie donner tous ces momens au culte diuin,

& au respect passionné des Puissances dominantes, temporelles & spirituelles, & vostre Altesse par expres, M O N S E I G N E V R, comme l'astre fatal qui fera prosperer nostre repos en nous comblant par sa conduite lumineuse, de felicittez & de douceurs, au delà de nostre espoir; & comme Dieu fera briller sur vostre excellente personne des benedictions & des ioyes, à preuue de toutes iniustes conspirations, il vous fera cognoistre le veritable zele que ie vous ay vouë en qualité,

M O N S E I G N E V R,

De Vostre Altesse,

La tres-humble & tres-obeïssante Seruante,
S V S A N N E D E N E R V E Z E.

De V. off. Alch.

